

Каноны о усопших восьми гласов

Начало канона, общее для всех заупокойных канонов.

Канон, глас 3-й,

Песнь 1

Ирмос: Пресекаемое море жезлом древле Израиль пройде, яко по пустыни, и крестообразно яве предуготовляет стези. Сего ради поим во хвалении чудному Богу нашему, яко прославися.

Припев: Дивен Бог во святых Своих, Бог Израилев (поклон).

Погребением Твоим смерть умертвив, и низложив адово мучительство, на небеса предтеча нам восшедый, страсотерпческий лик совознесл еси. Ныне же души упокой преставленныя к Тебе, Христе.

Покой, Господи, души усопших раб Твоих (поклон)¹.

Иже Божественныя мученики укрепляй, и теми прелесть потребивый, мольбами их, яко Бог, скончавшимся яже о Тебе, Спасе, безсмертие и блаженное наследие улучшить благоволи.

Слава: За рабы, Владыко, Твою кровь заклався, излиал еси, яко щедр, долг же за них воздая: сего ради, Милосерде, Тебе молим, преставленныя рабы Твоя к Тебе упокой.

И ныне: Чистую воспоим Богородицу, Бога рождшую, смертью Своею смерть нашу испровергшаго, жизнь источившаго нестаряющуюся, и во веки пребывающее блаженство.

Песнь 3

Ирмос: Иже от не сущих вся приведый, словом созидаемая, совершаемая Духом, Вседержителю Вышний, в любви Твоей утверди мене.

Дивен Бог во святых Своих, Бог Израилев.

Сздавый мя от земли, и к земли возвращена окаяннаго обновивый светлее, души усопших упокой молитвами мученик.

Покой, Господи, души усопших раб Твоих.

Страсотерпец мученик биеньми же и вязаньми, ранами и язвами, умолен бывая, души раб Твоих во святых селениих учини, Щедре.

Слава: Избави, Человеколюбче, рабы Твоя геенны, огня же и мрачных селений ада, иже верую, Владыко, усопшия Твоею надеждою.

¹ В 1-й и 9-й песнях припевы читаются с поклоном, в остальных – без поклона

И ныне: Священнейшая, яко Мати Зиждителя твари сущи, смерти разорившаго силу, Богородице Пречистая, и нетление нам даровавшаго.

Господи, помилуй (*трижды*).

Седален, глас 6-й

Воистинну суета всяческая, житие же сень и соние, ибо всуе мятется всяк земнородный, якоже рече Писание: егда мир приобретаем, тогда во гроб вселимся, идеже вкупе царие и нищии. Темже, Христе Боже, преставльшихся упокой, яко человеколюбец.

Слава и ныне, Богородичен: Всесвятая Богородице, во время живота моего не остави мене, человеческому предстательству не ввери мя, но Сама заступи и помилуй мя.

Песнь 4

Ирмос: Положил еси к нам твердую любовь, Господи: Единородного бо Твоего Сына за ны на смерть дал еси. Темже Ти зовем, благодаряще: слава силе Твоей, Господи.

Дивен Бог во святых Своих, Бог Израилев.

Во гроб за ны милостивно вселився, Владыко, гробы истощил еси яко Бог, и победоносцы явль мученики, в месте ослабления усопшия рабы Твоя учини.

Покой, Господи, души усопших раб Твоих.

Иже страдалец крепкия подвиги, и раны, и удов¹ отсечения, яже за тя претерпеша, Владыко, радуяся приемый, и яже приял еси, избави от мучения.

Слава: Иже мановением Своим живота имея умерение, безконечныя Твоя жизни и нетленныя славы сподоби, яже к Тебе преставил еси, греховное разорь средоградие.

И ныне: Мати воистинну и Дева явилася еси, Всенепорочная, зачатие и рождество истинно, к девству едина сочетавши: Бога бо родила еси, смерти разоршаго силу.

Песнь 5

Ирмос: К Тебе утренюю, всех Творцу, преимуществу всяк ум мирови, зане свет повеления Твоя, в нихже настави мя.

Дивен Бог во святых Своих, Бог Израилев.

В Церкви первенец, Блаже, прешедшия от нас мученик ради и честных страдалец мольбами: с праведными причти.

Покой, Господи, души усопших раб Твоих.

За избавление многих прегрешений, пресвятую кровь Твою, Христе,

¹ Уды – телесные члены

излиял еси; и ныне мученик Твоих, Спасе, мольбами, благочестно усопшия упокой.

Слава: Управи, Слове, отшедших души в вечное место сладости Твоея, яже паче ума, и святых Божественных светлости сподоби.

И ныне: Тебе, Деву, Юже паче слова во чреве необименное Слово заченшую, мертвым жизнь дающего, достойно блажим.

Песнь 6

Ирмос: Возведи от тли мя, Господи Боже мой, Иона вопияше, и аз вопию Ти: из глубины избави мя, Спасе, многих моих зол и к свету Твоему, молюся, настави.

Дивен Бог во святых Своих, Бог Израилев.

Преложи на радость в вере усопших рыдание, молитвами страстотерпец, препоясуя их благолепне, Христе, веселием, и к свету Твоему направляя и наставляя.

Покой, Господи, души усопших раб Твоих.

Упокой, Боже, множеством щедрот Твоих у патриархов в недре преставленных, идеже свет сияет светлый Твоего лица, Христе, презирая их вся прегрешения

Слава: Удиви на отшедших отсюда, и лютых жития избавленных, чудную милость, Христе, человеколюбия Твоего, и радости Твоея насыти и кротости.

И ныне: Мертвости и тли, и смерти избавихомся, преславным рождеством Твоим, Богомати: Ты бо нам родила еси, Чистая нетления источник, и Твоим светом мир весь просветила еси.

Господи, помилуй (*трижды*). Слава и ныне.

Кондак, глас 8-й

Со святыми упокой, Христе, души раб Твоих, идеже несть болезнь, ни печаль, ни воздыхание, но жизнь бесконечная.

Икос

Сам един еси Безсмертный, сотворивый и создавый человека; земнии убо от земли создахомся и в землю туюжде пойдём, якоже повелел еси создавый мя и рекий ми: яко земля еси и в землю отыдеши, аможе вси человецы пойдём, надгробное рыдание творяще песнь: аллилуия, аллилуия, аллилуия.

Песнь 7

Ирмос: Якоже древле благочестивыя три отроки оросил еси в пламени халдейском, светлым Божества огнем и нас озари, благословен еси, взывающия, Боже отец наших.

Дивен Бог во святых Своих, Бог Израилев.

Иже всем живоначалная, вина же и сила творительная, Слове Божий, обещанныя мучеником пищи сподоби души преставленных раб Твоих. Благословен еси Боже отец наших.

Покой, Господи, души усопших раб Твоих.

О телесех убо яко тленных, доблественне нерадиша славнии мученицы, Христе; ныне же со дерзновением молятся к Тебе: души покой преставленных раб Твоих. Отец наших Боже, благословен еси.

Слава: Тростию крестною подписал еси оставление грехов всем верным, емуже ныне души, яже преставил еси к Тебе, причаститися сподоби, и веселием пети Тя: отец наших, Боже, благословен еси.

И ныне: Слово Отчее, Иже вся волею содевая, естество человеческое, погребенное страстьми, яко Бог обноси; благословен, Пречистая, плод Твоего чрева.

Песнь 8

Ирмос: Служити Живому Богу в Вавилоне отроцы претерпевше, о мусикийских органех нерадиша и, посреде пламене стояще, боголепную песнь воспеваху, глаголюще: благословите, вся дела Господня, Господа.

Дивен Бог во святых Своих, Бог Израилев.

Сый сокровище бессмертия Ты, Живоначалниче, мертвым нетление провозвестил еси, еже Твоим мучеником, Христе, благочестно верою Тебе поющим даровал еси: благословите, вся дела Господня, Господа.

Покой, Господи, души усопших раб Твоих.

Мудростию духовною, и терпением дел крепции страдальцы о муках нерадиша, душам преставленным от Христа оставления просят, зовуще: благословите, вся дела Господня, Господа.

Слава: Очисти, Блаже, копием ребр Твоих растерзав рукописание к Тебе преставленных, и средоградие отъем прегрешений, песнословити Тя, прием их, Спасе, благоволи: благословите, вся дела Господня, Господа.

И ныне: Облак Тя мысленный претруждшимся жаждою умерщвления, Дево Чистая, вемы, воду живу оставления источающую, и мертвым бессмертие всем подающую, верою присно зовущим: благословите, вся дела Господня, Господа.

Песнь 9

Ирмос: Купиною и огнем прописанную в Синаи законоположнику Моисею и Божий во чреве неопально заченшую огонь, всесветлую и негасимую свещу, сущую Богородицу песньми, чтуще, величаем.

Дивен Бог во святых Своих, Бог Израилев.

Ныне яко един благ и человеколюбец Бог, преставленная к Тебе, мученик мольбами, в стране кротких земли всели, разрешение прегрешений подавая, Милостиве, сим, да непрестанно песньми Тя величаем.

Покой, Господи, души усопших раб Твоих.

Во святых селениих, в недрах Авраама, яже приял еси, Христе, причти с праведными Твоими, идеже сияет свет лица Твоего неизреченный и Божественный, и пребывающее во веки воистинну присносущное радование.

Слава: Блаженныя Твоя жизни и вечных благ непрестанныя пищи, веселия истиннаго сподоби рабы Твоя, яже преставил еси волею, Жизнодавче, в месте злачне, на водах покойных.

И ныне: Яко святой ковчег и свидения скиния законодавца Бога, прияла еси во утробе, Всенепорочная, Зиждителя Твоего, изречение древняя клятвы, и закон смерти Своею смертию испровергшаго.

Достойно есть яко воистинну блажити Тя, Богородицу, присноблаженную и пренепорочную и Матерь Бога нашего. Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем (*поклон*).

Окончание канона, общее для всех заупокойных канонов.